

## Bekalan barang keperluan, makanan di Sarikei mencukupi: KPDNHEP

2020-03-29T07:00:02+08:00



**PANTAU:** Anggota KPDNHEP Sarikei melakukan pemeriksaan di beberapa premis perniagaan di sekitar bahagian Sarikei.

**SARIKEI:** Bekalan barang keperluan dan makanan di bahagian ini adalah mencukupi, kata Ketua Cawangan Kementerian Perdagangan Dalam Negeri dan Hal Ehwal Pengguna (KPDNHEP) Sarikei Mohamad Zawawi.

Justeru katanya, penduduk diingatkan agar tidak melakukan pembelian panik sepanjang tempoh Perintah Kawalan Pergerakan (PKP) ini.



Menurut beliau, berdasarkan pemantauan KPDNHEP di beberapa premis perniagaan di bahagian ini, bekalan barang keperluan dan makanan diyakini tidak akan menghadapi masalah biarpun PKP dilanjutkan hingga 14 April depan.

"Pihak KPDNHEP akan sentiasa melakukan pemantauan di pasar raya dan kedai runcit di Sarikei bagi memastikan bekalan makanan dan keperluan asas lain mencukupi dan tidak mempunyai masalah.

"Kita sentiasa memantau barang keperluan di pasar raya dan kedai runcit di Sarikei termasuk di kawasan luar bandar seperti Pakan serta Julau bagi memastikan bekalan sentiasa mencukupi," katanya kepada media, semalam.

Selain itu katanya, pihak KPDNHEP juga telah mendapat jaminan daripada pembekal dan pemborong bagi memastikan bekalan sentiasa mencukupi bagi menampung keperluan pengguna di kawasan ini.

"Justeru, kita ingin menyeru masyarakat di bahagian ini agar bijak berbelanja terutama dalam menghadapi situasi sekarang.

"Berbelanjalah mengikut keperluan dan bukannya mengikut naluri.

"Pada masa sama, kita berharap tiada peniaga yang mengambil kesempatan dengan menaikkan harga barangan sesuka hati.

"Kita akan sentiasa melakukan pemantauan dan sesiapa yang tidak mematuhi peraturan akan dikenakan tindakan undang-undang," tegas Mohamad.

<https://www.utusanborneo.com.my/2020/03/29/bekalan-barang-keperluan-makanan-di-sarikei-mencukupi-kpdnhep>

